

Keksyon ak repons yo poze pi plis sou viza rezidans

Anbasad Etazini – Potoprens, Ayiti

1. Poukisa konsil la mande pou mwen fè tès san ke yo rele ADN?

Konsil la mande pou fè tès san (ADN) ak moun kap voye chèche ou a ou byen ak yon lòt moun nan fanmi ou, paske ou pa ba li kont prèv ke moun sa se fanmi ou. Rezulta san sa se pi gwo prèv pou montre ke nou se fanmi. Lè konsil la ap travay sou dosye ou, li konsidere rezulta sa-a ak tout lòt papye ke ou te pote premye fwa-a nan randevou.

2. Kisa mwen dwe fe lè yon konsil mande pou mwen fè tès san yo rele ADN?

Jou randevou a, anvan ou kite konsila ameriken, ou dwe li ak anpil atansyon tout sa ki ekri nan papye ke konsil la remèt ou. Si li mande pou fè on tès san ak moun kap voye chèche ou byen ak on lòt moun ki nan fanmi ou kap viv Ozetazini, ou dwe rantre an kontak rapid ak youn nan laboratwa ki nan papye a san pèdi tan.

3. Nan ki sikorans ptit mwen ka jwen on paspò ameriken?

Se sèlman sitwayen ameriken ki gen dwa a paspò ameriken. Ptit ou ka vini on sitwayen ameriken e jwen on paspò ameriken si li fèt aprè ke ou menm ou vini on sitwayen ameriken. Si ou kwè ptit ou gen chans pou li jwen on paspò ameriken, ou dwe rele Sevis ki pou sitwayen ameriken ki nan konsila. Lè sa, yap ba ou on randevou pou ka vin deklare timoun nan e ranpli tout fomilè pou yo ka prepare paspò a.

4. Mwen menm ak fanmi m' pa gen menm dat randevou, eske nou tout ka vini ansanm, on sèl jou?

Konsila ameriken toujou fè efò pou li bay tout timoun ansanm ak paran yo randevou pou menm jou. Men, si ou resevwa on dat randevou ki ta diferan ak moun nan fanmi ou e ou ta renmen chanje li, tanpri rele sant dapèl nou ki se CIVA nan nimero sa: 2229-5001 (Ayiti) ak 1-877-917-2482 (Etazini). Fòk nou sonje ke nimewo telefòn sa yo ka chanje ninpòt kilè.

5. Mwen gen randevou pou viza rezidans mwen, ki papye pou mwen pote?

Jou randevou nan konsila ameriken, ou dwe vini ak tout papye ki enpòtan pou dosye ou. Vini avèk foto, papye transfè epi tout lòt papye pou montre ke moun kap voye cheche ou se fanmi ou. Si ou pa vini ak tout papye yo mande ou, Konsil la gen dwa refize ou viza e mande ou pou pote sa ki manke a yon lot jou anvan yo remèt ou viza rezidans lan.

6. Konsil la di mwen ke tout bagay anfòm pou mwen jwen viza, konbyen tan lap pran pou nou remèt mwen paspò a?

Lè konsil la di ou ke ou pare pou jwen viza, li ka pran pou plis 8 a 15 jou pou yo enprime viza a epi voye pakè rezidans la pou ou nan sèvis Ayiti Mesaje (RBC) ki la pou remèt ou li. Tanpri pa achte biyè pou pati epi pa fè ankenn lòt aranjman si ou

poko resevwa paspò ansanm avèk pakè rezidans lan.

7. Mwen viv Ozetazini san pèmisyon Gouvènman ameriken. Kisa pou mwen pote nan konsila jou randevou?

Ou dwe pote tout papye ki montre ki lè e kijan ou antre Ozetazini. Si ou te mande azil, fòk ou pote tout papye sa yo. Si se on biwo imigrasyon ou byen on tribunal ki te mande pou kite peyi a, fok ou vini ak papye sa yo tou. Li enpotan pou gen on papye ki montre ki jou ou retounen Ayiti.

8. Mwen vle vini on sitwayen ameriken, men mwen gen tan ranpli petisyon I-130 pou madanm ak pitit mwen, kisa pou mwen fè?

Ou ka toujou mande pou vinn on sitwayen ameriken. Men, ou dwe avèti sèvis imigrasyon lè ou vinn on sitwayen ameriken. Lè sa a wap voye kopi sètifica ki di ou se on sitwayen ameriken epi mande ke yo chanje kategori tout moun ke wap voye cheche yo. Pou plis enfòmasyon, ale sou sit entènèt www.uscis.gov

9. Mwen pap pati avèk pitit mwen yo ; pouki sa konsil la mande m' baptistè pou yo?

Li toujou enpòtan pou konsil la verifye si tout moun se vreman fanmi, menm si ou pa gen lide pati ansanm avèk timoun yo. Fòk ou pa blyie, ke nou gen dwa al verifye tout papye ou pote nan konsila a.

10. Bèlmè/Bòpè pitit mwen voye chèchè yo. pou kisa konsil la mande papye pou konnen si mwen legal Ozetazini?

Konsil la bezwen konnen si ou legal Ozetazini, menm si se pa ou menm ki ap mande rezidanss pou timoun yo, pou ede l deside si timoun yo gen dwa resevwa rezidanss la. N'ap beswen prev sa tou, si ou bay papye taks ou ak afidavit sipò pou ede dosye a.

11. Lè mwen tap fè demann rezidans, mwen te gentan bay on kopi kat rezidans mwen nan sèvis imigrasyon. Poukisa yo mande mwen pou mwen bay on lòt?

Souvan, demann ou fè nan sèvis imigrasyon kon pran tan anvan ke yo voye dat randevou pou ou. Lè konsa kopi kat rezidans ou te bay la kòn pa ka itilize ankò paske dat la pase. Fok nou sonje, ke se sèlman moun ki legal Ozetazini ki ka fè on demann pou rezidans. Se pou tèt sa, ou dwe toujou on rezidan pou ou ka kontinye ak dosye a. Pa blyie nou gen dwa verifye tout papye ke ou pote ba nou.

12. Kisa on waiver ye? Kiyès ki bezwen waiver? Kiyès ki kalifye pou waiver? Konbyen tan on waiver pran?

Règ sou imigrasyon ak naturalizasyon (8 U.S.C) eksplike kilè on moun pa kalifye pou resevwa on viza rezidanss. Ou gen dwa pa kalifye pou anpil rezon : si ou gen maladi SIDA, si ou poitrinè (tuberculose), si ou te komèt kèk krim ou byen ou tap viv san papye legal Ozetazini. (Sa nou site la yo pa on list konplè). Gras a règ sa, si ou se mari/madanm, fianse (fi ou gason) osinon pitit on sitwayen ameriken ou byen pitit on rezidan kap viv Ozetazini ki te fè on move bagay ke lalwa peyi sa pa dakò avèk li, ou kalifye pou ranpli yon waiver (otorizasyon espesial). Se sèvis imigrasyon ki

responsab pou travay sou waiver ou mande a. Konsil la pa kapab di ou konbyen tan sèvis imigrasyon pran pou li reponn sou waiver ou a. Pou plis enfòmasyon, ale sou entènèt: www.uscis.gov.

13. Konbyen tan konsil la ap pran pou pale avèk mwen jou randevou a?

Jou randevou a, konsil la ka pale avèk ou pandan 5 minit pou piti. Men tou li gen dwa kontinye pale avèk ou pi plis toujou paske fòk sa ou di yo montre li ke ou kalifye pou jwen viza rezidanss. Gen de lè, li ka menm mande ou pou tounen nan konsila on lòt jou avèk lòt papye. Ou dwe tounen nan konsila ak tout papye ke li te mande ou pou pote. Lè sa ou ede li travay pi vit sou dosye ou a.

14. Kisa kap pase jou randevou mwen nan konsila?

Le ou rive nan konsila, gen moun ki la pou resevwa ou e mennen ou nan sal viza rezidanss la. Le ou chita nan sal la, yo gen pou yo rele ou pou yo pran tout papye ou pote ki enpotan pou dosye ou. Apre, ou pral fè anprint 10 dwèt epi wap tann konsil la rele ou pou pale ak ou. Nan konsila, nou toujou fè anpil efò pou nou resevwa granmoun ak timoun yo avan e nou toujou eseye resevwa tout moun chak jou. Gen de jou, konsil yo konn fini a 2è laprèmidi e menm pita tou. Se pou sa, nou ankourage tout moun manje avan yo vini nan randevou ou byen pou nou pote on ti bagay pou nou manje tankou bonbon, papita ... pou ou avèk pitit ou. Tanpri pa vini avèk manje kwit.

15. Kisa sa vle di lè yo di mwen "Nap travay sou dosye ou" (administrative processing)? Konbyen tan sa pran?

Dapre lalwa imigrasyon ak naturalizasyon, on moun ki gen dosye rezidanss nan anbasad ameriken dwe pou li pote bon papye pou pemèt konsil la kwè ke li kalifye pou viza rezidanss. Se pou sa konsil la konn pran plis tan pou li verifye enfòmasyon ou pote. Konsil la ap eseye travay vit e lap kontakte ou kou li gen lòt enfòmasyon pou ou.

16. Eske mwen ka ede on konsil pran desizyon sou dosye rezidans mwen?

Lè ou ap reponn keksyon yo poze ou, ou toujou dwe di tout laverite. Bay manti sou kilès ou ye ou byen vini avèk fo papye pou dosye ou se yon bagay serie ki ka retire tout chans ou genyen pou recevwa rezidanss la. Tanpri reponn keksyon yo san pale anpil epi tou bay detay sèlman si yo mande ou pou eksplike. Konsa ou va ede konsil la deside pi vit sou dosye ou a.

17. Nan ki lang yo pral poze mwen keksyon?

Konsil yo konn pale kreyol, fransè ak angle. Si ou paka konprann lè yo ap pale avèk ou, ou ka toujou mande èd.

18. Eske mwen ka pote manje nan konsila a?

Ou ka toujou pote on ti manje ki pa manje kwit ou byen manje pou tibebe jou ap vini nan randevou a. Nou pa konseye ou pote on pakèt manje nan konsila e nou pa genyen kizin pou itilize. Si ou kite konsila a pou ale manje anvan ke konsil la rele ou, ou pap gendwa pou retounen anndan an. Si moun ki la pou sekirite wè ke manje ou pote-a ap deranje lot moun ki vini nan randevou ou byen li anpeche konsil yo fè

travay yo, li gen dwa mande pou deplace e menm jete manje sa.

19. Mwen gen on moun ki relem ki mande mwen lajan pou dosye mwen ka mache. Eske se volè?

Wi se volè. Se selman anploye konsila ou byen konsil kap travay nan konsila ameriken ki gen dwa mande pou peye lajan pou petisyon ou byen pou demann viza rezidanss ou a. Lè sa, ou pral peye direkteman nan kess anbasad la. Si on moun ta rele ou pou mande ou lajan ou byen li di ou ke li ka ede ou fè dosye ou a mache, tanpri rele touswit responsab seksyon frod nan nimero sa yo: 2229-8000 ou byen 3462-9225

20. Mwen gen on fanmi mwen ki gen on problem e mwen ta renmen konsila ba li on dat randevou byen vit, eske sa posib?

Konsila ameriken konprann ke fanmi ou gen on problem men li pa bay randevou sa yo souvan. Men ou ka toujou ekri nou pou eksplike problem ou nan adrès sa a: papcons@state.gov. Lwa federal pa ba nou dwa paske fanmi ou gen on problem pou nou kouri ba ou randevou sof pou kek ka. Nou kapab bay dat randevou a sèlman lè sèvis imigrasyon aprouve yon petisyon e lè nou resevwa tout papye ki enpòtan pou dosye ou.

21. Mwen se on sitwayen ameriken ou byen on rezidan Ozetazini kap viv isit an Ayiti. Eske mwen ka fè on demann rezidans pou on fanmi mwen nan konsila?

Si ou se on sitwayen ameriken, ou gen pou ou ranpli on demann pou rezidans nan konsila avek on anploye kap travay imigrasyon. Ou dwe montre ke ou se fanmi moun sa a e ke ou ap viv an Ayiti. Si ou se on rezidan, ou dwe montre tou ke ou se fanmi moun sa a e montre tou ke ou pa pedi rezidans ou paske ou te pase plis ke yon lane an Ayiti. Pou plis enfomasyon, tanpri ale sou entenet. Men adres la: www.uscis.gov.